

## **ПЕСНОПЕНИЯ ЧАСОВ** **БЫВАЕМЫХ В НАВЕЧЕРИИ РОЖДЕСТВА ХРИСТОВА**

### **ЧАС ПЕРВЫЙ**

Начало обычное.

**Приидите, поклонимся, трижды.**

**Псалом 5.**

**Г**лаголы моя внуши, Господи, разумей звание мое. Вонми гласу моления моего, Царю мой и Боже мой, яко к Тебе помолюся, Господи. Заутра услыши глас мой, заутра предстану Ти, и узриши мя. Яко Бог не хотяй беззакония Ты еси: не приселится к Тебе лукавнуяй, ниже пребудут беззаконницы пред очима Твоима: возненавидел еси вся делающия беззаконие. Погубиши вся глаголющия лжу: мужа кровей и льстива гнушается Господь. Аз же множеством милости Твоя вниду в дом Твой, поклонюся ко храму святому Твоему в страхе Твоем. Господи, настави мя правдою Твоею, враг моих ради исправи пред Тобою путь мой. Яко несть во устех их истины, сердце их суетно, гроб отверст гортань их: языки своими льщаху. Суди им, Боже, да отпадут от мыслей своих, по множеству нечестия их изрини я, яко преогорчиша Тя, Господи. И да возвеселятся вси уповающие на Тя, во век возрадуются, и вселишися в них, и похвалятся о Тебе любящие Имя Твое. Яко Ты благословиши праведника, Господи, яко оружием благословения венчал еси нас.

**Псалом 89.**

**Г**осподи, Прибежище был еси нам в род и род. Прежде даже горам не быти и создатися земли и вселенней, и от века и до века Ты еси. Не отврати человека во смирение и рекл еси: обратитесь, сынове человечестии. Яко тысяща лет пред очима Твоима, Господи, яко день вчерашний, иже мимо иде, и стража нощная. Уничужения их лета будут: утро, яко трава, мимо идет, утро процветет и прейдет: на вечер отпадет, ожестеет и исхнет: яко исчезохом гневом Твоим, и яростию Твоею смутихомся. Положил еси беззакония наша пред Тобою, век наш в просвещение лица Твоего. Яко вси дние наша оскудеша, и гневом Твоим исчезохом: лета наша яко паучина поучахуса: дние лет наших, в нихже седмьдесят лет, аще же в силах, осмьдесят лет, и множае их труд и болезнь: яко прииде кротость на ны, и накажемся. Кто весть державу гнева Твоего, и от страха Твоего ярость Твою изчести? Десницу Твою тако скажи ми, и окованныя сердцем в мудрости. Обратися, Господи, доколе? и умолен буди на рабы Твоя. Исполнихомся заутра милости Твоя, Господи, и возрадовахомся, и возвеселихомся: во вся дни наша возвеселихомся, за дни, в няже смирил ны еси, лета, в няже видехом злая. И призри на рабы Твоя и на дела Твоя, и настави сыны их. И буди светлость Господа Бога нашего на нас, и дела рук наших исправи на нас, и дело рук наших исправи.

**Псалом 100.**

**М**илость и суд воспою Тебе, Господи. Пою и разумею в пути непорочне, когда приидеши ко мне? Прехождах в незлобии сердца моего посреде дому моего. Не предлагах пред очима моима вещь законопреступную: творящия преступления возненавидех. Не прильпе мне сердце строптиво, уклоняющагося от мене лукаваго не познах. Оклеветающаго тай искренняго своего, сего изгонях. Гордым оком и несытым сердцем, с сим не ядах. Очи мои на верныя земли, посаждати я со мною:

ходяй по пути непорочну, сей ми служаше. Не живяше посреде дому моего творяй гордыню, глаголай неправедная, не исправляше пред очима моима. Во утрия избивах вся грешныя земли, еже потребити от града Господня вся делающия беззакония.

**Слава, и ныне, аллилуиа, трижды. Господи помилуй, трижды.**

**Слава, тропарь предпразднства, глас 4:**

**Н**аписовашеся иногда со старцем Иосифом, \* яко от семени Давидова в Вифлееме Мариам, \* чревоносящи безсеменное Рождение: \* наста же время рожества и место ни едино же бе обиталищу: \* но якоже красная палата, \* вертеп Царице показашеся. \* Христос раждается прежде падший воскресити образ.

**И ныне, Богородичен:**

**Ч**то Тя наречем, о Благодатная; \* Небо, яко возсияла еси Солнце правды: \* рай, яко прозябла еси Цвет нетления: \* Деву, яко пребыла еси Нетленна: \* Чистую Матерь, яко имела еси на святых своих объятиях Сына, всех Бога. \* Того моли спастися душам нашим.

**Таже тропари сия по дважды поем, глас 8:**

**В**ифлееме уготовися, благоукраситеся ясли, \* вертепе приими, Истина прииде, сень мимотече, \* и Бог человеком от Девы явися, \* вообразився якоже мы, и обожив плоть. \* Тем Адам обновляется со Евою зовуще: \* на земли благоволение явися спасти род наш. **[Дважды]**

**Таже поем, глас 3:**

**Стих: Бог от юга приидет и Святый из горы приосененныя чащи.**

**Н**ыне пророческое прорицание исполнится грядет, \* тайно глаголющее: \* и ты Вифлееме, \* земле Иудова, \* никакоже наречешися менши во владыках предуготовляющи вертеп. \* Из тебе бо Ми изыдет Игумен языков во плоти, \* от Девы Отроковицы Христос Бог, \* Иже упасет люди Своя новаго Исраиля: \* дадим Ему вси величие.

**Стих: Господи, услышах слух Твой и убояхся, Господи, разумех дела Твоя и ужасохся.**

**Н**ыне пророческое прорицание исполнится грядет, \* тайно глаголющее: \* и ты Вифлееме, \* земле Иудова, \* никакоже наречешися менши во владыках предуготовляющи вертеп. \* Из тебе бо Ми изыдет Игумен языков во плоти, \* от Девы Отроковицы Христос Бог, \* Иже упасет люди Своя новаго Исраиля: \* дадим Ему вси величие.

**Слава и ныне, глас 8:**

**С**ия глаголет Иосиф к Деве: \* Марие, что дело сие, \* еже в Тебе зрю; \* недоумею и удивляюся, \* и умом ужасаюся: \* отай убо от мене буди вскоре. \* Марие, что дело сие, \* еже в Тебе вижу; \* за честь, срамоту: \* за веселие, скорбь: \* вместо еже хвалитися, укоризну ми принесла еси. \* Ктому не терплю уже поношений человеческих: \* ибо от иерей из церкви Господни \* яко непорочну Тя приях, и что видимое;

**Прокимен глас 4: Господь рече ко мне: \* Сын Мой еси Ты, Аз днесь родих Тя.**

**Стих: Проси от мене, и дам Ти языки достойные Твое и одержание Твое концы земли.**

### **Пророчества Михеина чтение [Глава 5]**

**Т**ако глаголет Господь: и ты Вифлееме, доме Евфрафов, еда мал еси, еже быти в тысящах Иудовых; Из тебе бо мне изыдет старейшина, еже быти в княза во израили: и исходи Его из начала от дней века. Сего ради даст я, до времени раждающая родит, и прочии от братий Его обратятся к сыновом Израилевым. И тсанет, и узрит, и упасет стадо Свое крепостию Господь. И в славе имени Господа Бога своего пребудут: зане ныне возвеличится даже до конец земли.

### **Ко евреем послания святого апостола Павла чтение [зач. 303]**

**М**ногочастне и многообразне древле Бог, глаголавый отцем во пророцех. В последок дний сих глагола нам в Сыне, Егоже положи наследника всем, Имже и веки сотвори. Иже Сый сияние славы и образ Ипостаси Его, нося же всяческая глаголом силы Своя, Собою очищение сотворив грехов наших, седе одесную Престола величества на высоких. Толико лучший быв Ангел, елико преславнее паче их наследствова имя. Кому бо рече когда от Ангел: Сын Мой еси Ты, Аз днесь родих Тя; и паки: Аз буду Ему во Отца, и Той будет Мне в Сына. Егда же паки вводит Первороднаго во вселенную, глаголет: и да поклонятся Ему вси Ангели Божии. И ко Ангелом убо глаголет: творяй Ангелы Своя духи и слуги Своя огонь палящ. К Сыну же: престол Твой, Боже, в век века, жезл правости, жезл Царствия Твоего. Возлюбил еси правду и возненавидел еси беззаконие, сего ради помаза Тя, Боже, Бог Твой елеем радости паче причастник Твоих. И паки: в начале Ты, Господи, землю основал еси, и дела руку Твоею суть небеса. Та погибнут, Ты же пребываеши, и вся, якоже риза, обетшают, и, яко одежду, свиеши их, и изменятся; Ты же тойжде еси, и лета Твоя не оскудеют.

### **Евангелие Матфеа, зач. 2.**

**И**исус Христово рождество сице бе: обрученной убо бывши Матери Его Марии Иосифови, прежде даже не снитися има, обретесе имущи во чреве от Духа Свята. Иосиф же, муж Ея, праведен сый и, не хотя Ея обличити, восхоте тай пустити Ю. Сия же ему помыслившу, се Ангел Господень во сне явися ему, глаголя: Иосифе, сыне Давидов, не убойся прияти Мариам, жены твоея, рождающее бо ся в Ней от Духа есть Свята. Родит же Сына, и наречеши имя Ему Иисус. Той бо спасет люди Своя от грех их. Сие же все бысть, да сбудется реченное от Господа пророком, глаголющим: се Дева во чреве приимет и родит Сына, и нарекут имя Ему Еммануил, еже есть сказуемо, с нами Бог. Востав же Иосиф от сна, сотвори, якоже повеле ему Ангел Господень, и прият Жену свою. И не знаяше Ея, дондеже роди Сына Своего первенца, и нарече имя Ему Иисус.

### **Посем:**

**С**топы моя направи по словеси Твоему, и да не обладает мною всякое беззаконие. Избави мя от клеветы человеческия, и сохраню заповеди Твоя. Лице Твое просвети на раба Твоего, и научи мя оправданием Твоим.

**Д**а исполнятся уста моя хваления Твоего, Господи, яко да воспую славу Твою, весь день великолепие Твое.

**Трисвятое. По Отче наш:**

**кондак, глас 3:**

**Д**ева днесь Превечное Слово \* в вертепе грядет родити неизреченно: \* ликуй вселенная услышавши, \* прослави со ангелы и пастырьми, \* хотящаго явится Отроча младо Превечнаго Бога.

**Господи, помилуй, 40.**

**И**же на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагоутробе, Иже праведныя любяй и грешныя милуяй, Иже вся зовый ко спасению, обещания ради будущих благ: Сам Господи, прими и наша в час сей молитвы, и исправи живот наш к заповедем Твоим. Душы наша освяти, телеса очисти, помышления исправи, мысли очисти, и избави нас от всякия скорби, зол и болезней, огради нас святыми Твоими ангелы, да ополчением их соблюдаеми и наставляеми, достигнем в соединение веры, и в разум непреступныя Твоя славы, яко благословен еси во веки веков, аминь.

**Господи, помилуй, трижды.**

**Слава, и ныне: Честнейшую Херувим: Молитвами святых отец наших:**

**Аминь**

**Х**ристе, Свете Истинный, просвещающий и освящающий всякаго человека, грядущаго в мир, да знаменается на нас свет лица Твоего, да в нем узрим Свет Непреступный: и исправи стопы наша к деланию заповедей Твоих, молитвами Пречистыя Твоя Матере, и всех Твоих святых, аминь.

**Слава, и ныне: Господи, помилуй, трижды. Господи, благослови.**

## ЧАС ТРЕТИЙ

Приидите, поклонимся, **трижды.**

### Псалом 16.

**У**слыши, Господи, правду мою, вонми моление моему. Внуши молитву мою не во устнах льстивых. От лица Твоего судьба моя изыдет, очи мои да видита правоты. Искусил еси сердце мое, посетил еси нощию, искусил мя еси и не обретеса во мне неправда. Яко да не возглаголют уста моя дел человеческих, за словеса устен Твоих аз сохраних пути жестоки. Соверши стопы моя во стезях Твоих, да не подвижутся стопы моя. Аз возвах, яко услышал мя еси, Боже, приклони ухо Твое мне, и услыши глаголы моя. Удиви милости Твоя, спасаяй уповаюция на Тя от противящихся деснице Твоей. Сохрани мя, Господи, яко зеницу ока, в крове крилу Твоего покрыеши мя. От лица нечестивых, острастших мя, врази мои душу мою одержаша. Тук свой затвориша, уста их глаголаше гордыню. Изгоняции мя ныне обыдоша мя, очи свои возложиша уклонити на землю. Обьяша мя, яко лев, готов на лов и яко скимен, обитаяй в тайных. Воскресни, Господи, предвари я и запни им, избави душу мою от нечестиваго, оружие Твое от враг руки Твоея. Господи, от малых от земли, раздели я в животе их, и сокровенных Твоих исполнися чрево их, насытятся сынов, и оставиша останки младенцем своим. Аз же правдою явлюся лицу Твоему, насыщуся, вегда явити ми ся славе Твоей.

### Псалом 24.

**К** Тебе, Господи, воздвигох душу мою, Боже мой, на Тя уповах, да не постыжуся во век, ниже да посмеют ми ся врази мои, ибо вси терпяции Тя не постыдятся. Да постыдятся беззаконнуюции вотще. Пути Твоя, Господи, скажи ми, и стезям Твоим научи мя. Настави мя на истину Твою и научи мя, яко Ты еси Бог Спас мой, и Тебе терпех весь день. Помяни щедроты Твоя, Господи, и милости Твоя, яже от века суть. Грех юности моя и неведения моего не помяни, по милости Твоей помяни мя Ты ради благости Твоея, Господи. Благ и прав Господь, сего ради законоположит согрешающим на пути. Наставит кроткия на суд, научит кроткия путем Своим. Все путие Господни милость и истина, взыскающим завета Его и свидения Его. Ради Имене Твоего, Господи, и очисти грех мой, мног бо есть. Кто есть человек бояйся Господа? Законоположит ему на пути, егоже изволи. Душа его во благих водворится, и семя его наследит землю. Держава Господь боящихся Его и завет Его явит им. Очи мои выну ко Господу, яко Той исторгнет от сети нозе мои. Призри на мя и помилуй мя, яко единород и нищ есмь аз. Скорби сердца моего умножишася, от нужд моих изведи мя. Виждь смирение мое и труд мой и остави вся грехи моя. Виждь враги моя, яко умножишася, и ненавидением неправедным возненавидеша мя. Сохрани душу мою, и избави мя, да не постыжуся, яко уповах на Тя. Незлобивии и правии прилепляхуся мне, яко потерпех Тя, Господи. Избави, Боже, Израиля от всех скорбей его.

### Псалом 50.

**П**омилуй мя, Боже, по велицей милости Твоей, и по множеству щедрот Твоих очисти беззаконие мое. Наипаче омой мя от беззакония моего, и от греха моего очисти мя. Яко беззакония моя аз знаю и грех мой предо мною есть выну. Тебе Единому согреших, и лукавая пред Тобою сотворих, яко да оправдишися во словесех Твоих и победиши, вегда судити Ти. Се бо, в беззакониих зачат есмь, и во



гресех роди мя мати моя. Се бо, истину возлюбил еси, безвестная и тайная премудрости Твоя явил ми еси. Окропиши мя иссопом, и очищуся, омыеши мя, и паче снега убелюся. Слуху моему даси радость и веселие, возрадуются кости смиренные. Отврати лице Твое от грех моих, и вся беззакония моя очисти. Сердце чисто созижди во мне, Боже, и дух прав обнови во утробе моей. Не отвержи мене от лица Твоего, и Духа Твоего Святого не отыми от мене. Воздаждь ми радость спасения Твоего, и Духом Владычним утверди мя. Научу беззаконныя путем Твоим, и нечестивии к Тебе обратятся. Избави мя от кровей, Боже, Боже спасения моего, возрадуется язык мой правде Твоей. Господи, устне мои отверзеш, и уста моя возвестят хвалу Твою. Яко аще бы восхотел еси жертвы, дал бых убо, всесожжения не благоволиши. Жертва Богу дух сокрушен, сердце сокрушено и смиренно Бог не уничижит. Ублажи, Господи, благоволением Твоим Сиона, и да созиждутся стены Иерусалимския. Тогда благоволиши жертву правды, возношение и всесожегаемая, тогда возложат на олтарь Твой тельцы.

**Слава, и ныне, аллилуиа, трижды. Господи помилуй, трижды.**

**Слава, тропарь, глас 4:**

**Н**аписовашеся иногда со старцем Иосифом, \* яко от семени Давидова в Вифлееме Мариам, \* чревоносящи безсеменное Рождение: \* наста же время рождества и место ни едино же бе обиталищу: \* но якоже красная палата, \* вертеп Царице показашеся. \* Христос раждается прежде падший воскресити образ.

**И ныне, Богородичен:**

**Б**огородице, Ты еси Лоза Истинная, \* Возрастившая нам Плод Живота, \* Тебе молимся, молися Владычице, \* со святыми Апостолы, \* помилувати души наша.

**Таже тропари сия по дважды поем, глас 6:**

**С**ей Бог наш, \* не вменится ин к Нему, \* родивыйся от Девы, \* и с человеки поживе: \* во яслех убогих, \* Сын Единородный, лежащъ видится Человек: \* и пеленами повивается Иже славы Господь: \* и волхвом звезда возвещает в Его поклонение. \* И мы поим: \* Троице Святая, спаси души наша. **[Дважды]**

**Таже поем, глас 8:**

**Стих: Бог от юга приидет, и Святыи из горы приосененныя чащи.**

**П**режде Рождества Твоего, \* трепетно зряще таинство Твое Господи, \* разумная воинства дивляхуся: \* якоже бо младенец родитися благоизволил еси, \* небо Украсивый звездами, \* и во яслех безсловесных возлежиши, \* дланию Содержай всея земли концы: \* таковым бо смотрением \* уведено бысть милосердие Твое, Христе. \* Велия милость Твоя, слава Тебе.

**Стих: Господи, услышах слух Твой и убояхся, Господи, разумех дела Твоя и ужасохся.**

**П**режде Рождества Твоего, \* трепетно зряще таинство Твое Господи, \* разумная воинства дивляхуся: \* якоже бо младенец родитися благоизволил еси, \* небо Украсивый звездами, \* и во яслех безсловесных возлежиши, \* дланию Содержай всея земли концы: \* таковым бо смотрением \* уведено бысть милосердие Твое, Христе. \* Велия милость Твоя, слава Тебе.

### Слава и ныне, глас 3:

**И**осифе рцы нам, \* како юже от святых приял еси Деву, \* непраздну приводиши в Вифлеем; \* Аз, рече, пророки испытах, \* и вестъ прием от ангела, \* уверихся, яко Бога родит Мариа несказанно, \* Емуже на поклонение волсви от востоков приидут, \* с дары честными служаще. \* Воплотивыйся нас ради Господи, слава Тебе.

### Прокимен, глас 4:

**Прокимен:** Отроча родися нам, \* Сын, и дадесе нам.

**Стих:** Егоже начальство быть на раме Его.

### Пророчества Иеремиина чтение [Глава 3: Варуха 5 и 4]

**С**ей Бог наш, не приложится ин к Нему Изобрете всяк путь художества, и даде Иакову отроку Своему, и Израилю возлюбленному от Него. Посем же на земли явися и с человеки поживе. Сия книга повелений Божиих, и закон сый во веки, вси держащиися ея в живот, оставившии ея умрут. Обратися Иакове, и имися ея, поиди к сиянию прямо света ея. Не даждь иному славы твоея, и полезных тебе языку чуждему. Блажени есмы Израилю, яко угодная Богу нам разумна суть.

### К галатом послания святого апостола Павла чтение [зач. 250]

**Б**ратие, благодаряще Бога и Отца, призвавшаго вас в причастие наследия святых во свете. Иже избави нас от власти темныя и престаши в Царство Сына любви Своея, о Немже имамы избавление Кровию Его и оставление грехов. Иже есть образ Бога невидимаго, перворожден всяе твари. Яко Тем создана быша всяческая, яже на небеси и яже на земли, видимая и невидимая, аще престолы, аще господствия, аще начала, аще власти: всяческая Тем и о Нем создашася. И Той есть прежде всех, и всяческая в Нем состоятся. И Той есть глава телу Церкви, Иже есть начаток, перворожден из мертвых, яко да будет во всех Той первенствуя.

### Евангелие Луки, зач. 5.

**В**о днех оных изыде повеление от кесаря Августа написати всю вселенную. Сие написание первое бысть, владыцу Сириею Кириною. И идяху вси написатися, кождо во свой град. Взыде же и Иосиф от Галилеи из града Назарета во Иудею, во град Давидов, иже нарицается Вифлеем, зане быти ему от дому и отечества Давидова, написатися с Мариною, обрученною ему Женою, сущею непраздною. Бысть же, егда быша тамо, исполнишася дние родити Ей. И роди Сына Своего первенца, и повит Его, и положи Его в яслех, зане не бе им места во обители. И пастырие беху в тойже стране, бдяще, и стрегуще стражу нощную о стаде своем. И се Ангел Господень ста в них, и слава Господня осия их, и убояшася страхом велиим. И рече им Ангел: не бойтеся, се бо благовествую вам радость велию, яже будет всем людем, яко родися вам днесь Спас, иже есть Христос Господь, во граде Давидове. И се вам знамение: обрящете Младенца повита, лежаща в яслех. И внезапно бысть со Ангелом множество вой Небесных, хвалящих Бога и глаголющих: слава в Вышних Богу, и на земли мир, в человецех благоволение. И бысть, яко отыдоша от них на Небо Ангели, и человецы пастырие реша друг ко другу: преидем до Вифлеема и видим глагол сей бывший, егоже Господь сказа нам. И приидоша, поспешшесе, и обретоша Мариам же и Иосифа и Младенца, лежаща во яслех. Видевше же, сказаша о глаголе, глаголанном им о Отрочати Сем. И вси слышавшии дивившася о глаголаных от пастырей к ним. Мариам же соблюдаше вся глаголы сия,

слагаючи в сердца Своем. И возвратишася пастырие, славяще и хваляще Бога о всех яже слышаша и видеша, якоже глаголаше бысть к ним.

**Г**осподь Бог благословен, благословен Господь день дне, поспешит нам Бог спасений наших, Бог наш, Бог спасти.

**Трисвятое. По** Отче наш:

**Кондак, глас 3:**

**Д**ева днесь Превечное Слово \* в вертепе грядет родити неизреченно: \* ликуй вселенная услышавши, \* прослави со ангелы и пастырьми, \* хотящаго явится Отроча младо Превечнаго Бога.

**Г**осподи, помилуй, **40.**

**И**же на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагоутробе, Иже праведныя любяй и грешныя милуяй, Иже вся зовый ко спасению, обещания ради будущих благ: Сам Господи, прими и наша в час сей молитвы, и исправи живот наш к заповедем Твоим. Душы наша освяти, телеса очисти, помышления исправи, мысли очисти, и избави нас от всякия скорби, зол и болезней, огради нас святыми Твоими ангелы, да ополчением их соблюдаеми и наставляеми, достигнем в соединение веры, и в разум неприступныя Твоя славы, яко благословен еси во веки веков, аминь.

**Г**осподи, помилуй, **трижды. Слава, и ныне: Честнейшую Херувим:**

**М**олитвами святых отец наших:

**Аминь**

**Потом молитву сию, святого Маркариа:**

**В**ладыко Боже Отче Вседержителю, Господи Сыне Единородный Иисусе Христе, и Святой Душе, Едино Божество, Едина Сила, помилуй мя грешнаго, и имиже веси судьбами, спаси мя, недостойнаго раба Твоего, яко благословен еси во веки веков, аминь.



## ЧАС ШЕСТЫЙ

Приидите, поклонимся, трижды.

И псалмы: псалом 53.

**Боже**, во Имя Твое спаси мя, и в силе Твоей суди ми. Боже, услыши молитву мою, внуши глаголы уст моих. Яко чужднии восташа на мя и крепцыи взыскаша душу мою, и не предложиша Бога пред собою. Се бо Бог помогает ми, и Господь заступник души моей. Отвратит злая врагом моим, истиною Твоею потреби их. Волею пожру Тебе, исповемся имени Твоему, Господи, яко благо, яко от всякия печали избавил мя еси, и на враги моя воззре око мое.

Псалом 54:

**Внуши**, Боже, молитву мою и не презри моления моего. Вонми ми и услыши мя: возскорбех печалию моею и смятохся. От гласа вражия и от стужения грешнича, яко уклониша на мя беззаконие и во гневе враждоваху ми. Сердце мое смятется во мне и боязнь смерти нападе на мя. Страх и трепет прииде на мя и покры мя тьма. И рех: кто даст ми криле, яко голубине? И полещу, и почию? Се удалихся бегая и водворихся в пустыни. Чаях Бога, спасающаго мя от малодушия и от бури. Потопи, Господи, и раздели языки их: яко видех беззаконие и пререkanie во граде. Днем и ноцию обыде и по стенам его. Беззаконие и труд посреде его и неправда. И не оскуде от стогн его лихва и лесь. Яко аще бы враг поносил ми, претерпел бых убо, и аще бы ненавидяй мя на мя велеречевал, укрыл бых ся от него. Ты же, человече равнодушне, владыко мой и знаемый мой, иже купно наслаждался еси со мною брашен, в дому Божии ходихом единомышлением. Да приидет же смерть на ня, и да снидут во ад живи, яко лукавство в жилищах их, посреде их. Аз к Богу воззвах, и Господь услыша мя. Вечер и заутра, и полудне повем, и возвещу, и услышит глас мой. Избавит миром душу мою от приближающихся мне, яко во мнозе бяху со мною. Услышит Бог и смирит я, Сый прежде век. Несть бо им изменения, яко не убояшася Бога. Простре руку свою на воздаяние, оскверниша завет Его. Разделишася от гнева лица Его, и приближишася сердца их, умякнуша словеса их паче елеа, и та суть стрелы. Возверзи на Господа печаль твою, и Той тя препитает, не даст в век молвы праведнику. Ты же, Боже, низведеша их во студенец исления, мужие кровей и льсти не преполовят дней своих. Аз же, Господи, уповаю на Тя.

Псалом 90.

**Живый** в помощи Вышняго, в крове Бога Небеснаго водворится. Речет Господеви: Заступник мой еси и Прибежище мое, Бог мой, и уповаю на Него. Яко Той избавит тя от сети ловчи, и от словесе мятежна, плещма Своима осенит тя, и под криле Его надеешися: оружием обыдет тя истина Его. Не убоишися от страха нощнаго, от стрелы летящая во дни, от вещи во тме преходящая, от сряца, и беса полуденнаго. Падет от страны твоя тысяща, и тма одесную тебе, к тебе же не приблизится, обаче очима твоима смотриши, и воздаяние грешников узриши. Яко Ты, Господи, упование мое, Вышняго положил еси прибежище твое. Не приидет к тебе зло, и рана не приблизится телеси твоему, яко Ангелом Своим заповесть о тебе, сохранити тя во всех путех твоих. На руках возмут тя, да не когда преткнеша о камень ногу твою, на аспида и василиска наступиши, и попереши льва и змия. Яко на Мя упова, и избавлю и: покрыю и, яко позна имя Мое. Воззовет ко Мне, и услышу его: с ним есмь в скорби, изму его, и прославлю его, долготою дней исполню его, и явлю ему спасение Мое.

Слава, и ныне, аллилуиа, трижды. Господи помилуй, трижды.

Слава, тропарь, глас 4:

Написовашеся иногда со старцем Иосифом, \* яко от семени Давидова в Вифлееме Мариам, \* чревоносящи безсеменное Рождение: \* наста же время рождества и место ни едино же бе обиталищу: \* но якоже красная палата, \* вертеп Царице показашеся. \* Христос раждается прежде падший воскресити образ.

И ныне, Богородичен:

Яко не имамы дерзновения \* за премногия грехи наша, \* Ты Иже от Тебе Рождагоя моли, Богородице Дево: \* много бо может моление Матернее ко благосердию Владыки: \* не презри грешных мольбы, Всечистая, \* яко Милостив есть и спасти Могий, \* Иже и страдати о нас изволивый.

Сия тропари по дважды поем, глас 1:

Приидите вернии возведемся божественне, \* и видим схождение Божественное свыше, \* в Вифлееме к нам явленне: \* и умом очистившися житие принесем добродетели, \* вместо мура предуготовляюще верно рождественныя входы, \* от душевных сокровищ зовуще: \* в вышних слава Богу Сущему в Троице: \* Егоже ради в человецех благоволение явися, \* Адама избавляя первородныя клятвы, яко Человеколюбец. [Дважды]

Глас 4:

Стих: Бог от юга приидет, и Святыи из горы приосененныя чащи.

Слыши небо и внуши земле, \* да подвижатся основания, \* да примут трепет преисподняя: \* яко Бог же и Творец в плотское одеяся здание, \* и Иже державною рукою Создавый тварь, \* утробы зрится здание. \* О глубина богатства и премудрости и разума Божия! \* Яко неиспытаны судьбы Его, и неизследовани путие Его.

Стих: Господи, услышах слух Твой и убояхся, Господи, разумех дела Твоя и ужасохся.

Слыши небо и внуши земле, \* да подвижатся основания, \* да примут трепет преисподняя: \* яко Бог же и Творец в плотское одеяся здание, \* и Иже державною рукою Создавый тварь, \* утробы зрится здание. \* О глубина богатства и премудрости и разума Божия! \* Яко неиспытаны судьбы Его, и неизследовани путие Его.

Слава, глас 5:

Приидите христоноснии людие, \* да видим чудо, \* всякий разум ужасающее и обдержажее: \* и благочестно воспевающе вернии, поклонимся. \* Днесь в Вифлееме непраздна сущи Дева приходит родити Господа: \* лица же ангельстии предтекут. \* И сия видевопяише Иосиф обручник: \* что еже в Тебе странное таинство, Дево, \* и како хочещи родити, неискусобрачная Юнице;

И ныне, паки тойже.

Прокимен глас 4: Из чрева прежде денницы родих Тя, клятвася Господь и не раскается.

Стих: Рече Господь Господеви моему: седи одесную Мене.

## Пророчества Исаина чтение. [глава 7 и 8]

**П**риложи Господь глаголати ко Ахазу, глаголя: проси себе знамения у Господа Бога твоего, во глубину или в высоту. И рече Ахаз: не имам просити, ниже искусити Господа. И рече Исаиа: услышите убо доме Давидов, еда мало вам труд подаяти человеком, и како Господу труд даете? Сего ради даст Господь Сам вам знамение: се Дева во чреве приимет, и родит Сына, и нарекут имя Его Еммануил. Масло и мед имать снести, прежде неже уведети Ему, или изволити лукавое, избрет благое: зане прежде неже разумети отрочати благое или злое, отринет лукавая, и избрет благое. И рече Господь ко мне: приими себе свиток нов велик, и напиши в нем писалом человеческим, еже скоро пленение сотворити корыстем: настоят бо. И свидетели мне сотвори верны человеки, Урию иереа, и Захарию сына Варахиина. И приступих ко пророчице, и во чреве прият, и роди сына. И рече мне Господь: нарцы имя ему, Скоро плени, и напрасно испроверзи. Зане прежде неже разумети отрочати прозвати отца или мать, приимет силу Дамаскову, и корысти Самарийския, прямо царю Ассирийскому. С нами Бог, разумеите языцы и покаряйтесь: услышите даже до последних земли, могущии покаряйтесь: аще бо паки возможете, и паки побеждени будете. И иже аще совет совещаваете, разорит Господь. И слово, еже аще возглаголете, не пребудет в вас: яко с нами Бог.

## Ко евреем послания святого апостола Павла чтение [зач. 304]

**В** начале Ты, Господи, землю основал еси, и дела руку Твоею суть Небеса. Та погибнут, Ты же пребываеши, и вся, якоже риза, обетшают, и, яко одежду, свиеши их, и изменятся, Ты же тойжде еси, и лета Твоя не оскудеют. Кому же от Ангел рече когда: седи одесную Мене, дондеже положу враги Твоя подножие ног Твоих. Не вси ли суть служебнии дуси, в служение посылаеми за хотящих наследовати спасение? Сего ради подобает нам лишше внимати слышанном, да не когда отпаднем. Аще бо глаголанное Ангелы слово бысть известно и всяко преступление и ослушание, праведное прият мздовоздаяние. Како мы убежим, о толицем нерадивше спасении, еже зачало приемше, глаголатися от Господа слышавшими в нас известися?

## Евангелие Матфеа, зач. 3.

**И**исусу рождшуся в Вифлееме Иудейстем во дни Ирода царя, се волсви от восток приидоша во Иерусалим, глаголюще: где есть рождейся Царь Иудейский? Видехом бо звезду Его на востоце и приидохом поклонитися Ему. Слышав же, Ирод царь смутися, и весь Иерусалим с ним. И собрав вся первосвященники и книжники людския, вопрошаше от них: где Христос раждается? Они же рекоша ему: в Вифлееме Иудейстем. Тако бо писано есть пророком: и ты, Вифлееме, земле Иудова, ничимже меньши еси во владыках Иудовых, из тебе бо изыдет Вождь, иже упасет люди Моя Израиля. Тогда Ирод тай призва волхвы и испытываше от них время явльшиися звезды. И, послав их в Вифлеем, рече: шедше, испытайте известно о Отрочати; егда же обрящете, возвестите ми, яко да и аз, шед, поклонюся Ему. Они же, послушавше царя, идоша. И се звезда, юже видеша на востоце, идяше пред ними, дондеже, пришедше, ста верху, идеже бе Отроча. Видевше же звезду, возрадовашася радостию великою зело. И, пришедше в храмину, видеша Отроча с Мариною, Материю Его, и, падше, поклонишася Ему, и, отверзше сокровища своя, принесоша Ему дары, злато, и ливан, и смирну. И, вестъ приемше во сне, не возвратитися ко Ироду, иным путем отыдоша во страну свою.

**С**коро да предварят ны щедроты Твоя, Господи, яко обнищавом зело: помози нам, Боже Спасе наш, славы ради Имене Твоего, Господи, избави нас, и очисти грехи наша, Имене ради Твоего.

**Трисвятое. По** Отче наш:

**Кондак, глас 3:**

**Д**ева днесь Превечное Слово \* в вертепе грядет родити неизреченно: \* ликуй вселенная услышавши, \* прослави со ангелы и пастырьми, \* хотящаго явитися Отроча младо Превечнаго Бога.

**Господи, помилуй, 40.**

**И**же на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагодарителю, Иже праведныя любяй и грешныя милуяй, Иже вся зовый ко спасению, обещания ради будущих благ: Сам Господи, прими и наша в час сей молитвы, и исправи живот наш к заповедем Твоим. Душы наша освяти, тела очисти, помышления исправи, мысли очисти, и избави нас от всякия скорби, зол и болезней, огради нас святыми Твоими ангелы, да ополчением их соблюдаемы и наставляемы, достигнем в соединение веры, и в разум непреступныя Твоя славы, яко благословен еси во веки веков, аминь.

**Господи, помилуй, трижды. Слава, и ныне: Честнейшую Херувим:**

**Молитвами святых отец наших:**

**Аминь**

**И молитву великаго Василиа:**

**Б**оже и Господи сил, и вся твари Содетелю, Иже за милосердие безприкладныя милости Твоя, Единороднаго Сына Твоего, Господа нашего Иисуса Христа, Низпославый на спасение рода нашего, и честным Его Крестом рукописание грех наших Растерзавый, и Победивый Тем начала и власти тьмы: Сам, Владыко Человеколюбче, прими и нас, грешных, благодарственныя сия и молебныя молитвы, и избави нас от всякаго всегубительнаго и мрачнаго прегрешения, и всех озлобити нас ищущих, видимых и невидимых враг, пригвозди страху Твоему плоти наша, и не уклони сердец наших в словеса или помышления лукавствия, но любовию Твоею уязви души наша: да к Тебе всегда взирающе, и еже от Тебе светом наставляемы, Тебе Непреступнаго и Присносущнаго зряще Света, непрестанное Тебе исповедание и благодарение возсылаем, Безначальному Отцу, со Единородным Твоим Сыном, и Всесвятым, и Благим, и Животворящим Твоим Духом, ныне и присно и во веки веков, аминь.

## ЧАС ДЕВЯТЫЙ

Приидите, поклонимся, трижды.

### Псалом 83

**К**оль возлюбленна селения Твоя, Господи сил! Желает и скончается душа моя во двory Господни, сердце мое и плоть моя возрадовастся о Боже Живе. Ибо птица обрете себе храмину, и горлица гнездо себе, идеже положит птенцы своя, олтари Твоя, Господи сил, Царю мой и Боже мой. Блажени живущии в доме Твоем, в веки веков восхвалят Тя. Блажен муж, емуже есть заступление его у Тебе; восхождения в сердце своем положи, во юдоль плачевную, в место, еже положи, ибо благословение даст законополагаяй. Пойдут от силы в силу: явится Бог богов в Сионе. Господи Боже сил, услыши молитву мою, внуши, Боже Иаковль. Защитниче наш, виждь, Боже, и призри на лице христа Твоего. Яко лучше день един во дворех Твоих паче тысяч: изволих приметатися в дому Бога моего паче, неже жити ми в селениях грешничих. Яко милость и истину любит Господь, Бог благодать и славу даст, Господь не лишит благих ходящих незлобием. Господи Боже сил, блажен человек уповаяй на Тя.

### Псалом 84

**Б**лаговолил еси, Господи, землю Твою, возвратил еси плен Иаковль: оставил еси беззакония людей Твоих, покрыл еси вся грехи их. Укротил еси весь гнев Твой, возвратился еси от гнева ярости Твоя. Возврати нас, Боже спасений наших, и отврати ярость Твою от нас. Еда во веки прогневаешия на ны? Или прострещи гнев Твой от рода в род? Боже, Ты обращаешься оживиши ны, и людие Твои возвеселятся о Тебе. Яви нам, Господи, милость Твою, и спасение Твое даждь нам. Услышу, что речет о мне Господь Бог: яко речет мир на люди Своя, и на преподобныя Своя, и на обращающыя сердца к Нему. Обаче близ боящихся Его спасение Его, вселити славу в землю нашу. Милость и истина сретостеса, правда и мир облобызастся. Истина от земли возсия, и правда с Небесе приниче, ибо Господь даст благость, и земля наша даст плод свой. Правда пред Ним предъидет, и положит в путь стопы своя.

### Псалом 85

**П**риклони, Господи, ухо Твое, и услыши мя, яко нищ и убог есмь аз. Сохрани душу мою, яко преподобен есмь: спаси раба Твоего, Боже мой, уповающего на Тя. Помилуй мя, Господи, яко к Тебе воззову весь день. Возвесели душу раба Твоего, яко к Тебе взях душу мою. Яко Ты, Господи, Благ и Кроток и Многомилостив всем, призывающим тя. Внуши, Господи, молитву мою, и вонми гласу моления моего. В день скорби моя возвах к Тебе, яко услышал мя еси. Несть подобен Тебе в бозех, Господи, и несть по делом твоим. Все языцы, елики сотворил еси, приидут, и поклонятся пред Тобою, Господи, и прославят Имя Твое, яко Велий еси Ты и Творяй чудеса, Ты еси Бог Един. Настави мя, Господи, на путь Твой, и пойду во истине Твоей; да возвеселится сердце мое бояться Имене Твоего. Исповемся Тебе, Господи Боже мой, всем сердцем моим, и прославлю Имя Твое в век: яко милость Твоя велия на мне, и избавил еси душу мою от ада преисподнейшаго. Боже, законопреступницы восташа на мя, и сонм державных взыскаша душу мою и не предложиша Тебе пред собою. И Ты, Господи Боже мой, Щедрый и Милостивый, Долготерпеливый и Многомилостивый и Истинный, призри на мя и помилуй мя, даждь державу Твою отроку Твоему, и спаси сына рабы Твоя. Сотвори со мною знамение во благо, и да видят ненавидящии мя и постыдятся, яко Ты, Господи, помог ми и утешил мя еси.



Слава, и ныне, аллилуиа, трижды. Господи помилуй, трижды.

Слава, тропарь, глас 4:

Написовашеся иногда со старцем Иосифом, \* яко от семени Давидова в Вифлееме Мариам, \* чревоносящи безсеменное Рождение: \* наста же время рождества и место ни едино же бе обиталищу: \* но якоже красная палата, \* вертеп Царице показашеся. \* Христос раждается прежде падший воскресити образ.

И ныне, Богородичен:

Иже нас ради Рождейся от Девы, \* и распятие претерпев, Благий, \* Испровергий смертию смерть, \* и воскресение Явлей, яко Бог, \* не презри, яже создал еси рукою Твоею, \* яви человеколюбие Твое, Милостиве, \* приими Рождшую Тя Богородицу, \* молящуюся за ны, и спаси, Спасе наш, люди отчаянные.

Таже тропари сия по дважды поем, глас 7:

Удивляшеся Ирод, зря волхвов благочестие, \* и гневом побеждаемь, \* лета испыташе разстояния. \* Матери безчадствуемы бываху, \* и безвременный возраст младенцев горце пожинашеся. \* Сосцы ссыхашуся, \* и источники млечнии удерживашуся, \* велие бяше лютое: \* темже благочестно вернии \* сошедшеся поклонимся \* Христову Рождеству. [Дважды]

Тропарь, глас 2:

Стих: Бог от юга придет, и Святыи из горы приосененныя чаши.

Егда Иосиф, Дево, \* печалию уязвляшеся, \* к Вифлеему идя, вопияла еси к нему: \* что Мя зря непразду, \* дряхлуеши и смущаешися, \* не ведый всяко еже во Мне страшнаго таинства; \* прочее отложи страх всяк, \* преславное познавая. \* Бог бо низходит на землю милости ради, \* во чреве Моем ныне, \* аще и плоть прият: \* Егоже раждаема узриши, \* якоже благоизволи, и радости исполнися поклонишися \* яко Зиждителю твоему. \* Егоже ангели поют непрестанно, \* и славословят со Отцем и Духом Святым.

Стих: Господи, услышах слух Твой и убояхся, Господи, разумех дела Твоя и ужасохся.

Егда Иосиф, Дево, \* печалию уязвляшеся, \* к Вифлеему идя, вопияла еси к нему: \* что Мя зря непразду, \* дряхлуеши и смущаешися, \* не ведый всяко еже во Мне страшнаго таинства; \* прочее отложи страх всяк, \* преславное познавая. \* Бог бо низходит на землю милости ради, \* во чреве Моем ныне, \* аще и плоть прият: \* Егоже раждаема узриши, \* якоже благоизволи, и радости исполнися поклонишися \* яко Зиждителю твоему. \* Егоже ангели поют непрестанно, \* и славословят со Отцем и Духом Святым.

Слава, и ныне, глас 6:

Днесь раждается от Девы \* рукою всю Содержай тварь: \* пеленами якоже земен повивается, \* Иже существом неприкосновенен Бог: \* в яслех возлежит Утвердивый небеса словом в началех: \* от сосцев млеко питается, \* Иже в пустыни манну Одождивый людем: \* волхвы призывает Жених церковный, \* дары сих приемлет Сын Девы. \* Поклоняемся Рождеству Твоему, Христе: \* поклоняемся Рождеству Твоему, Христе: \* покажи нам и божественная Твоя Богоявления.

И творим три поклона.



### Прокимен, глас 4:

Прокимен: Мати Сион речет: \* человек и человек родился в нем.

Стих: Основания его на горах святых.

### Пророчества Исаиина чтение [глава 9]

Отроча родился нам, Сын и дадесе нам, Егоже начальство бысть на раме Его: и нарицается имя Его велика совета ангел. Чуден Советник, Бог крепок, Властитель, Начальник мира, Отец будущего века: приведет бо мир на начальники, и здравие Его. И велие начальство Его, и мира Его несть предела, на престол Давидов, и на царство его исправити е, и заступити е судьбою и правдою, от ныне и до века: ревность Господа Саваофа сотворит сия.

### Ко евреом послания святого апостола Павла чтение [зач. 306]

Братие, святый и освящаемый, от Единого вси, еяже ради вины не стыдится братию нарицати их, глаголя: возведу Имя Твое братии Моей, посреде Церкви воспою Тя. И паки: Аз буду надеяся Нань. И паки: се Аз и дети, яже Ми дал есть Бог. Понеже убо дети приобщися плоти и крови, и Той приискренне приобщися техже, да смертию упразднит имущаго державу смерти, сиречь диавола, и избавит сих, елицы страхом смерти чрез все житие повинни беша работе. Не от Ангел убо когда приемлет, но от семене Авраамова приемлет; отнюдуже должен бе по всему подобитися братии, да милостив будет и верен первосвященник в тех, яже к Богу, во еже очистити грехи людския. В немже бо пострада, Сам искушен быв, может и искушаемым помощи.

### Евангелие Матфея, зачало 4.

Отшедшим волхвом, се Ангел Господень во сне явился Иосифу, глаголя: встав, поими Отроча и Матерь Его, и бежи во Египет, и буди тамо, дондеже реку ти, хоцет бо Ирод искати Отрочате, да погубит Е. Он же, встав, поят Отроча и Матерь Его нощию и отыде во Египет. И бе тамо до умертвия Иродова, да сбудется реченное от Господа пророком, глаголющим: от Египта возвах Сына Моего. Тогда Ирод, видев, яко поруган бысть от волхвов, разгневался зело и, послав, избил вся дети, сущия в Вифлееме и во всех пределах его, от двою лету и нижайше по времени, еже известно испыта от волхвов. Тогда сбывается реченное Иеремием пророком, глаголющим: глас в Раме слышан бысть, плачь, и рыдание, и вопль мног. Рахиль плачущися чад своих и не хотяше утешитися, яко не суть. Умершу же Ироду, се Ангел Господень во сне явился Иосифу во Египте, глаголя: встав, поими Отроча и Матерь Его и иди в землю Израилеву, изомроша бо ищущии души Отрочате. Он же, встав, поят Отроча и Матерь Его и прииде в землю Израилеву. Слышав же, яко Архелай царствует во Иудеи вместо Ирода, отца своего, убояся тамо ити. Вест же приемь во сне, отыде в пределы Галилейския. И, пришед, вселися во граде, нарицаемем Назарет. Яко да сбудется реченное пророки, яко Назорей наречется.

Не предаждь нас до конца, Имене Твоего ради, и не разори завета Твоего, и не остави милости Твоя от нас, Авраама ради возлюбленного от Тебе, и за Исаака, раба Твоего, и Израиля святого Твоего.

Трисвятое. По Отче наш:

### Кондак, глас 3:

Дева днесь Превечное Слово \* в вертепе грядет родити неизреченно: \* ликуй вселенная услышавши, \* прослави со ангелы и пастырьми, \* хотящаго явитися Отроча младо Превечнаго Бога.

**Господи, помилуй, 40.**

**И**же на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагоутробе, Иже праведныя любяй и грешныя милуяй, Иже вся зовый ко спасению, обещания ради будущих благ: Сам Господи, прими и наша в час сей молитвы, и исправи живот наш к заповедем Твоим. Душы наша освяти, тела очисти, помышления исправи, мысли очисти, и избави нас от всякия скорби, зол и болезней, огради нас святыми Твоими ангелы, да ополчением их соблюдаеми и наставляеми, достигнем в соединение веры, и в разум неприступныя Твоя славы, яко благословен еси во веки веков, аминь.

**Господи, помилуй, трижды. Слава, и ныне: Честнейшую Херувим:**

**Молитвами святых отец наших:**

**Аминь**

**И молитва святого Василия великаго:**

**В**ладыко Господи Иисусе Христе Боже наш, долготерпевый о наших согрешениих, и даже до нынешняго часа приведый нас, вонже на животворящем древе вися, благоразумному разбойнику иже в рай путесотворил еси вход, и смертию смерть разрушил еси, очисти нас грешных и недостойных раб Твоих. Согрешихом бо и беззаконновахом, и несмы достойни возвести очеса наша и воззрети на высоту Небесную, зане оставихом путь правды Твоя, и ходихом в волях сердец наших. Но молим Твою безмерную благодать, пощади нас, Господи, по множеству милости Твоя, и спаси нас Имене Твоего ради Святаго, яко исчезоша в суете дние наша, изми нас из руки сопротивнаго, и остави нам грехи наша, и умертви плотское наше мудрование, да ветхаго отложивше человека, в новаго облечемся: и Тебе поживем, нашему Владыце и Благодетелю, и тако Твоим последующе повелением, в вечный покой достигнем, идеже есть всех веселящихся жилище, Ты бо еси воистинну истинное веселие и радость любящих Тя, Христе Боже наш, и Тебе славу возсылаем, со Безначальным Твоим Отцем, и Пресвятым и Благим и Животворящим Твоим Духом, ныне и присно и во веки веков. Аминь.

**Слава, и ныне. Господи, помилуй, трижды. Господи, благослови.**